

Memoria colectivo Voz I Landia y nos IMANI

Ayera mi tabata lesa di e homenaje cu lo tene pa nos idolo y icono musical **Robert Jean D'or**, relaciona cu su carera riba un caha di batata, un palet, un podio, un tarima, un escenario, y con cu nos kier yama e "pedestalnan" grandi y chikito. Robert cu a cuminsa for di den cura di cas riba un caha y a subi e escenarionan mas grandi di decenas te 2 pa 3 cien mil hende den publico, internacionalmente den diferente continente di e mundo aki.

Mi a lesa corantnan, scucha algun emisora, mira television, pero loke a bin dilanti tabata masha poco di locual mi tabata sa di e conferencia di prensa cu **Drs. Mirto Lacle** a tene e siman aki. Si a bin dilanti algun di e puntonan importante pa tene cuenta cune, y esey ta e show cu lo tin 19 di november na honor di **Robert Jean D'or** y na **Festival Voz I Landia Escolar**, e presentacion di e buki "**RELUCI—chispa musical**" relaciona cu historia di e festival, tambe algun di e artistanan cu lo presenta y tambe e agrupacionnan musical.


E BUKI DI JENNY

Mi ta menciona e buki di **Jenny (Jennifer Lacle-Boezem)** pasobra mi sa con duro el a traha pa por a logra e historia completo documenta di **Festival Voz I Landia Escolar**, pasobra e tabata para na e cuna di e baby cu a crece, tambe. For di mas o menos 8 luna pasa mi tabata sa di e trabao cu e tabata haci te cu 4 pa 6 luna pasa Mirto, na Biblioteca Nacional, a presenta algo di esaki den un rueda di prensa hunto cu **Eddy Marchena** cabesante di **Fatima college** cu tabata traha pa rebiba **Festival Voz I Landia**. Varios biaha Mirto cu mi a conversa tocante esaki, y te na comienzo di e siman aki ainda.

Jenny a bini cla cu e buki "**Reluci—Chispa musical Voz I Landia Escolar**" di mas o menos 160 pagina. Ta trata aki di un homenaje na nos muchanan artista di **Voz I Landia Escolar** cu despues a bira aduhtonan, tambe personanan cu talento cu a participa, y personanan cu menos talento cu tambe a haya chans di participa.

E buki ta cubri 1981 pa 2015. Scolnan tabata selecciona nan participantenan, y despues di e diferente presentacionnan tabata seleccion 5 participante di pariba y 5 di papao pa bay e final.

E prome aña di e festival tabata cu



participacion di cancionnan scogi di parti di e participantenan mes, pero despues a dicidi cu e cancionnan mester ta na Papiamentu. E buki cu Jenny a presenta cu "**Reluci—chispa musical**" **Memoria y Recuerdonan di Voz I Landia Escolar** tin mencion di 120 cancion di cualnan mas o menos 70 % ta cu nan letra original. E buki ta relata e historia, origen y desaroyo di e festival y cu ta recuerdonan grato pa tur esnan cu a yega di tin lo maximo y hasta lo minimo ainda pa haci cu e festival.

E festival aki tabata tin un periodo di oro y Jenny a logra rescata e memoria aki. Como co-fundador di e festival Jenny den e buki ta trece dilanti su propio experiencianan cu e festival cu tabata ademas un inspiracion grandi pa hopi hende pa mostra nan creatividad artistico musical, manera cantantenan, mu-

siconan, compositor y arreglistanan cu a participa y maestronan di scol. **Jamy de Freitas** tambe por papia di tur esaki.

Algun luna pasa ainda Jenny tabata casi cla y pidiendo esnan cu sa, pa mas informacion tocante nan experiencianan cu e festival. El a logra y a yega asina leu cu e buki tambe ta cla. Hopi aña el a traha riba e buki aki y poco poco a keda agrega pida pa logra e totalidad cu el a desea pasobra hopi informacion tabata den cashi scondi, den file, tambe partituranan musical etc. Esnan envolvi tabata tin nan den caha na scol, dencashi na scol of na cas tambe den tur magasin y deposito y orquesta hotoluis/houtluis a keda toca nan aña tras aña prome cu e logra resata nan pa e documento aki.

E no a lubida tampoco **Emile Kelboom** y **Eddy Tromp** cu tabata

graba e cancionnan di manera cu tabata selecta e mihornan di maximo 3 minuut pa pone riba mercado un LP.

Pa yega na e LP tabata traha e cinta di **Radio Kelbbom** cu e mihor calidad posibel cu experticio di **Emile y Eddy y Mirto Lacle** tabata biaha cu nan pa Miami pa aya laga graba e LP cu **ALM** cubriendo gastonan como patrocinador grandi.

Hopi di nos musiconan cu tabata forma e orquesta **Voz I Landia** tabata musiconan local cu talento excepcional musical y otronan cu a studia musica, bishita conservatorio etc. Awe nan ta e veteranonan grandi musical di nos isla.

Dia 19 di e luna aki den **Cas di Cultura** lo mira musiconan profesional di nos isla, y varios di nan cu tabata mucha tempo a cuminsa cu **Voz I Landia**. E orquesta e aña aki ta **Johnny Schaarbaay and Friends** bao direccion di maestro **Johnny Schaarbaay** cu na comienzo di e **Voz I Landia** tabata den su "teens" y awe ... awe ta riba e lista di dedenan di pianistanan di renombre di nos isla.

Aki mi ta sigui pa e otro artista grandi, pero bahista del alma.

ROBERT JEAND'OR E IMANI Colega **Gina** cu a bay conferencia di prensa di **Mirto**, a yega oficina y a puntrami **Kico ta Imani**? Mi di cune cu esey ta significa **Fe y Perseverancia** na un di e idiomanan africano. **IMANI** ta e titulo cu **Mirto** a duna **Robert Jeand'or** I... como **M...usical A...rubano N... acional I... nternacional**.

Dia 19 den e show lo presenta tambe un documentario masha interesante tratando desaroyo musical di **Robert**, **Obi**. Manera por a lesa ayera den **DIARIO**, e musico-bahista, cantante, salsero, merengero, tumbero y bolerista. E lo presenta tambe cu su banda **Robert y su Solo Banda show**. Eynan caba ta ripara cu e anochi aki ta bira un fiesta, hunto cu **Johnny Schaarbaay and Friends** pero lo tin tambe **Grupo Melodia** dirigi a **Rubin Ponsoon**, grupo di baile di **Club di Movimiento** dirigi pa **Samanta Westera** y varios di nos artistanan popular cu a lanta como mucha tempo di **Festival Voz I Landia Escolar** y cu awe ta grandinan di nos isla, si a participa of no den e festival cu sigur tabata nan guia y inspiracion.

Juby Naar